

KABAKTIANG MINGGU KATIGA

SIAP-SIAP

- Jamaat balajar lagu-lagu baru
- Sombayang di konsistori
- Majalis baca barita jamaat

A. DATANG PAR TUHAN

Kampinjang¹ babunyi tiga kali, **jamaat badiri** la manyanyi lagu maso. Waktu jamaat manyanyi, orang-orang yang pung tugas dalang ibada (*majalis yang pung tugas, pandita, majalis jamaat yang laeng, orang yang baca Alkitab, deng kolektan*) maso ka tampa ibada.

01. TUHAN ADA DENG KATONG DENG BILANG TABEA²

- Pdt³ : Deng nama Allah Bapa, Antua pung Ana Yesus Kristus, deng Antua pung Roh.
J : Amin.
Pdt : Beta minta biar Tuhan Allah kasi dame par basudara jamaat dong samua.
J : Antua kasi dame par bapa/ibu⁴ lai.

02. DONCI PUJI TUHAN (Dari Lagu-lagu par Puji Tuhan 100:1–5)⁵

- Pdt : Mari angka suara basar-basar barsuka par TUHAN, hoe samua orang di dunya! Mari somba TUHAN deng hati sanang.
J : Katong datang somba Antua deng hati sanang.
Pdt : Datang par Antua, badonci lagu-lagu gerat.
J : Katong barsuka puji TUHAN tagal Antua jaga deng kasi berkat par katong.
Pdt : Basudara dong musti tau kalo TUHAN tu Allah. Antua yang biking katong la katong ni Antua pung orang-orang. Katong ni Antua pung jamaat, macang deng domba sakawang yang Antua jaga di rumpu-rumpu di tana lapang.
J : Katong mangaku deng puji Tuhan Allah yang kasi salamat katong.
Pdt : Mari maso ka Antua pung kintal Ruma⁶ minta-minta dangke dari Antua. Mari badonci puji-puji Antua, waktu balenggang maso ka Antua pung Ruma.
J : Katong puji-puji katong pung Tuhan Allah yang pung kuasa paleng besar.
Pdt : Mari minta dangke dari Antua la puji-puji Antua.
Pdt+J : Tagal TUHAN tu paleng bae! Seng abis-abis Antua pung sayang. Dari moyang moyang sampe ka anana cucu abis anana cucu, Antua salalu biking Antua pung janji.

03. JAMAAT MANYANYI

(Abis manyanyi, langsung dudu)

04. SOMBAYANG MINTA TUHAN KASI UNJU ANTUA PUNG HATI BAE

- Pnt : Basudara e! Mari katong samua sombayang minta Tuhan kasi unju Antua

¹ **Kampinjang** ni lonceng gareja.

² **Tabea** ni pung arti sama deng "kalwedo" ka "kidabela". Bisa jua bilang, "Pagi bae" ka "Malang bae".

³ Bisa pandita, penatua, ka sapa sa yang pimping ibada.

⁴ Bisa pake istila laeng yang orang biasa pake di jamaat-jamaat ka daera-daera macang nyong pandita ka nona pandita, mama pandita ka papa pandita, bapa penatua ka om penatua, ...

⁵ Ka bisa pili *Lagu-lagu par Puji Tuhan* (Mazmur) laeng yang bicara soal hal yang sama.

⁶ **Ruma** di sini ni kasi unju par orang Yahudi pung Tampa Sombayang Pusat.

pung hati bae par katong, tagal katong pung dosa-dosa:

----- *Jamaat tado. Waktu itu ada orang yang barmaeng lagu
dari buku-buku lagu yang bisa pake di GPM*⁷ -----

- Pnt : Sio Tuhan yang paleng sayang katong e! Dunya ni labe hari labe tamba susa. Di sagala tampa, manusia sangsara tagal kajahatang, seng pung apapa, bodo, tinggal di balakang-balakang tana, galojo, batamang takaruang sampe jadi rusak, dapa perkosa, dong pung hak-hak dapa rampas, dapa tindis dari orang laeng, tana goyang deng hener basar, deng sagala macang panyaki yang biking manusia gamatar takotang.
- J : (*Manyanyi lagu "Minta Tuhan Kasi Unju Antua pung Hati Bae"*)⁸

||: 0 5 3 3 2 1 5 . 5 6 1 1 6 5 5 .

Sio Te-te Ma - nis ka-tong ma - nya-sal e

Sio Te-te Ma - nis am-pong ka - to-rang e

0 1 1 1 5 5 3 1 . 1 2 2 2 2 1 1 . :||

Ta-gal ka-tong i - ni pung sa - la ba-nya e

Ka-tong ang-ka jan-ji seng u - lang la - i e

3 3 2 2 1 5 . 5 6 1 1 6 5 5 .

Te-te Ma- nis e, sa-yang ka- to-rang e

0 1 1 1 5 5 3 1 . 1 2 2 2 2 1 1 . :||

Ka-si ka-tong deng-ang Roh Ba-e ju- a e

- Pnt : Sio Allah Bapa yang pung kuasa e! Dalang sangsara ni, katong jaga tanya kata Bapa ada di mana. Mangapa kong Bapa seng tolong katong waktu katong ada dalang bahaya deng sangsara? Tolong katong jua sio Allah yang kasi salamat manusia e, tagal Bapa pung kuasa paleng basar. Kasi ampong katong pung dosa-dosa deng kasi lapas katong dari susa deng sangsara ni jua, tagal Bapa pung kuasa tu paleng hebat.

- J : (*Manyanyi par "Minta Tuhan Kasi Unju Antua pung Hati Bae"*)

||: 3 5 6 1 6 5 3 3 . . :||

1. Ba - pa am-pong be-ta ju - a

2. Kris-tus am-pong be-ta ju - a

- Pnt : Sio Allah Bapa yang bae e! Katong basaro minta Bapa lunjur Bapa pung tangang la tarek katong kaluar dari dalang susa deng sangsara ni. Barang, tagal Bapa pung sayang katong hidop. Tagal Bapa pung kuasa katong kuat.

- J : Kasi kuat katong deng Tuhan Yesus Kristus pung Roh pung kuasa jua, biar katong mustahak deng salalu taru harap par Bapa waktu baku tangada deng masala-masala, biar katong bisa hidop batul di muka Bapa.

----- *Jamaat tado. Waktu itu ada orang yang barmaeng
lagu dari buku Nyanyian GPM* -----

⁷ Musti taru kira kalo waktu dudu tado tu seng paparipi deng formalitas bagitu saja. Tagal itu, bagus kalo ada lagu yang orang barmaeng palang-palang alus-alus, biar jamaat bisa batul-batul datang par Tuhan.

⁸ Bisa pili lagu *Minta Tuhan Kasi Unju Antua pung Hati Bae* (Kyrie Eleison) dalang KJ, PKJ, ka Nanyian GPM.

05. PUJI TUHAN ALLAH

- Pnt : Basudara samua, mari katong puji Tuhan tagal Antua kasi unju Antua pung hati bae par katong seng abis-abis.
- MJ : Mari katong puji-puji Allah yang ada di tampa yang paleng tinggi di sorga.
- J : Antua kasi dame par orang-orang yang biking Antua pung hati sanang.
- Pnt : Katong angka Bapa pung nama tinggi-tinggi. Katong puji-puji Bapa biar samua orang kanal Bapa.
- MJ : Katong somba deng taru hormat par Bapa tagal Bapa pung kuasa yang luar biasa. Bapa tu Tuhan. Bapa tu Raja yang pegang parenta di sorga. Bapa tu Allah yang pung kuasa paleng basar.
- J : (Manyanyi Ny.GPM 62) "Gloria" 1 = G
5 | 1 1 2 | 3 3 3 4 | 5 5 4 | 5 6 | 5 .
Glo - ri- a, Glo- ri -a in-ex- cel- cis De -o
5 | 1 1 7 6 | 5 5 1 2 | 3 3 3 3 2 | 1 . ||
Glo-ri- a, Glo - ri -a Ha- le- lu- ya, ha- le-lu-ya!
- Pnt : Sio Yesus Kristus, Tuhan Allah pung Ana satu areng-areng e! Bapa yang Allah su pili par tabus katong pung dosa-dosa deng yang dudu pegang parenta di Allah pung sabala kanang. Katong minta biar Bapa kasi unju Bapa pung hati bae par katong deng dengar katong pung sombayang ni jua.
- J : (Manyanyi Ny.GPM 62)
Gloria, Gloria in excelsis Deo.
Gloria, Gloria Haleluya, Haleluya !

B. BACA DENG DENGAR ALLAH PUNG AJARANG

06. SOMBAYANG MINTA TUHAN PUNG ROH TOLONG⁹

- Pnt : Sio Tuhan pung Roh, kasi barsi katong pung hati jua, biar katong bisa tarima Tuhan pung Ajarang la biking akang dalang katong pung hidop sabang hari. Amin!

07. BACA ALKITAB¹⁰:

(Famili satu: *papa, mama, deng ana*)

08. JAMAAT MANYANYI DENG HATI SANANG TAGAL SU DENGAR ALLAH PUNG KATA-KATA

(Manyanyi KJ 473a ka 473b)

- a. Haleluya, Haleluya, Haleluya (*Par Minggu Biasa, Tuhan Yesus Hidop Kombali, Tuhan Yesus Nai ka Sorga, Tuhan pung Roh Turung, deng Kajadiang*)
- b. Hosiana, Hosiana, Hosiana (*Par Minggu Sangsara*)
- c. Maranata, Maranata, Maranata (*Par Minggu Adventus*)

09. RIWAYAT

10. DUDU TADO LA INGA-INGA RIWAYAT (Waktu itu, ada orang yang langsung barmaeng lagu satu pake orjen ka suling ka alat musik laeng barang satu menit.)

⁹ Ini cuma conto sa, jadi bisa sombayang deng kata-kata sandiri.

¹⁰ Orang-orang yang baca Alkitab musti dapa kasi siap bae-bae biar dong bisa baca Alkitab bae-bae.

11. JAMAAT MANYANYI

C. JAMAAT PUNG JAWABANG

12. MANGAKU KATONG PUNG PARCAYA

(Langsung badiri)

Pdt : Basudara jamaat, mari katong mangaku katong pung parcaya sama-sama:

Beta parcaya par Allah Bapa
yang pung kuasa par samua-samua yang ada.
Antua yang biking langit deng dunya ni.

Beta parcaya par Yesus Kristus,
Allah pung Ana satu areng-areng,
yang jadi katong pung Raja.

Antua ada dalang Maria pung poro tagal Allah pung Roh,
la lahir ka dunya biar kata Maria ni masih parawang.

Antua daga siksa waktu Pontius Pilatus pegang parenta.
Antua daga salib, mati, la daga kubur.
Antua turung ka orang mati pung dunya,
la hidop kombali pas akang pung lusa.

Antua nai ka sorga,
dudu di Allah pung sabala kanang,
la pegang parenta sama-sama deng Antua
yang pung kuasa par samua yang ada.

Antua nanti datang dari sana
par jadi hakim par samua orang
yang masih hidop deng yang su mati.

Beta parcaya par Allah pung Roh.

Beta parcaya kalo Allah su pili katong
par jadi Yesus pung orang-orang
yang taika jadi satu di antero dunya ni,
deng sama-sama tarima apa yang bae dari Antua.

Beta parcaya kalo Antua kasi ampong katong pung dosa-dosa
deng nanti kasi hidop katong pung badang kombali,
la katong hidop tarus-tarus deng Antua.

Amin.

(Langsung dudu)

13. MANYANYI PUJI TUHAN: KOOR/VG/TRIO/SOLO/KA YANG LAENG

14. TANDA JAMAAT MINTA DANGKE



14.1. Nasehat par Jamaat :

Dkn : Basudara jamaat e, inga pasang dari Alkitab ni bae-bae:

"Kalo katong dapa apapa dari orang, katong sanang. Mar katong labe sanang lai kalo katong kasi apapa par orang." (Utusang pung Carita¹¹ 20:35b).

14.2. Jamaat Manyanyi : (*Waktu jamaat manyanyi, kolektan kumpul jamaat pung tanda minta dangke*)

14.3. Sombayang par apa yang jamaat su kasi

15. MANYANYI PUJI TUHAN : KOOR/VG/TRIO/SOLO/DENG YANG LAENG

16. SOMBAYANG PAR GAREJA DENG DUNYA

(*Laste, samua orang sombayang sama deng apa yang Yesus ajar. Mulai dari "Tagal Bapa tu Raja", samua manyanyi akang sama-sama.*)

Sio Bapa di Surga. Katong minta biar samua orang taru hormat par Bapa.

Katong minta biar Bapa parenta samua orang di dunya ni,
deng biar Bapa pung mau jadi di dunya ni sama deng yang jadi di sorga.

Katong minta biar Bapa kasi makanang yang katong parlu par katong makang hari ini.

Sio Bapa e! Tolong kasi ampong katong pung dosa-dosa jua,
sama deng katong jua su kasi ampong orang-orang yang biking sala par katong.

La jang kasi tinggal katong dapa coba par biking dosa.
Mar, kasi salamat katong jua dari Setang pung Raja pung kuasa.

— 6 6 — 6 6 — 6 6 — 3 3 .
Tagal Ba-pa i - tu Ra-ja
— 1 2 — 3 3 — 3 3 — 5 3 — 1 2 — 3 3 .

Deng yang pung ku - a - sa par sa-mua sa-mu-a
— 3 6 — 6 6 — 6 6 — 1 6 — 5 3 — 3 2 — 3 .
Deng yang mus -ti da- pa pu-ji ta - rus ta - rus
— 2 1 6 . ||
A -----min

D. ALLAH UTUS JAMAAT DENG JANJI PAR ADA SAMA-SAMA DENG KATONG

17. JAMAAT MANYANYI

(*Abis manyanyi, langsung badiri*)

18. ALLAH UTUS¹²

¹¹ Ini ni Kisah Para Rasul.

¹² Bagiang ini bisa ganti deng bagiang laeng yang sama deng Allah pung Ajarang yang pandita kasi waktu riwayat. Conto sa dari Lukas 10:3, 19; I Timotius 3:13, 6:12, ka nats laeng yang bicara soal hal yang sama.

Pdt : Basudara jamaat yang Tuhan Yesus sayang, pulang deng sanang la biking basudara dong pung tugas par kasi tau soal Kristus par orang-orang dalang basudara dong pung hidop sabang hari. La inga nats Alkitab ni biar basudara dong kuat, “*Orang yang pung pikirang tajang seng bole puji diri tagal dia pung pikirang tajang. Orang yang kuat seng bole puji diri tagal dia kuat. La orang kaya seng bole puji diri tagal dia kaya. Mar sapa yang mau puji diri, dia musti puji diri tagal dia kanal Beta luar dalang. Dia musti puji diri tagal dia mangarti kalo Beta ni TUHAN yang seng barenti-barenti sayang samua orang...*” (Yeremia 9:23-24b)

19. ALLAH JANJI PAR ADA SAMA-SAMA DENG KATONG

Pdt : Jamaat samua, par biking tugas yang Allah su kasi par katong tu, mari dengar apa yang Antua su janji par katong ni :
“...Beta minta biar Allah, yang su biking katong pung hati dame tu, kasi apa sa yang bae yang kamong parlu par biking Antua pung mau. Beta jua minta biar lewat Yesus, Allah karja dalang katong pung hati par biking apa sa yang Antua mau. Mari katong puji-puji Yesus Kristus tarus-tarus.” (Dari Ibrani 13:20-21)

J : (Manyanyi)¹³

3 3 3 2 13 21 5 . . ||

A-min, a-min, a ----- min.

----- **Dudu** tado la minta dangke dari Allah -----

(*Jamaat tolong jang kaluar kamuka pandita deng majalis dong. Pandita deng majalis-majalis bajalang kaluar la badiri di muka pintu. Tarus pandita deng majalis-majalis pegang tangang deng jamaat, bagitu lai jamaat deng jamaat. Waktu dong samua ada pegang tangang, kantoria ka majalis yang pung tugas pimping lagu.*)

¹³ Bisa ambe lagu *Amin amin amin* jua dari KJ No 48 a, b, ka c.